





舊五代史卷九十九

宋門下侍郎參知政事監修國史薛居正等撰

漢書第一

高祖紀上

高祖睿文聖武昭肅孝皇帝姓劉氏諱曷本名知遠及即位改今諱其先本沙陁部人也四代祖諱湍帝有天

下追尊為明元皇帝廟號文祖陵曰懿陵五代會要湍為東漢顯宗

第八子淮陽王昞之後高祖母隴西李氏追諡明貞皇后曾祖諱

昂晉贈太保追尊為恭僖皇帝廟號德祖陵曰沛陵五代

會要懿陵沛陵皆無陵所遙申朝拜曾祖母魏國太夫人楊氏追諡恭惠



皇后祖諱僊晉贈太傅追尊為昭獻皇帝廟號翼祖陵  
曰威陵祖母魯國太夫人李氏追諡為昭穆皇后皇考  
諱瑄事後唐武皇帝為列校晉贈太師追尊為章聖皇  
帝廟號顯祖陵曰肅陵皇妣吳國太夫人安氏追諡章  
懿皇后后以唐乾寧二年歲在乙卯二月四日生帝于  
太原帝弱不好弄嚴重寡言及長面紫色目睛多白初  
事唐明宗列于麾下明宗與梁人對柵于德勝時晉高  
祖為梁人所襲馬甲連草斷帝輟騎以授之取斷草者  
自跨之徐殿其後晉高祖感而壯之明宗踐阼晉高祖  
為北京留守以帝前有護援之力奏移麾下署為牙門

都枝應順初晉高祖鎮常山唐明宗召赴闕會閔帝出  
奔與晉高祖相遇于途遂俱入衛州泊于郵舍閔帝左  
右謀害晉高祖帝密遣御士石敢袖鎚立于晉高祖後  
及有變敢擁晉高祖入一室以巨木塞門敢尋死焉帝

率眾盡殺閔帝左右遂免晉高祖于難

通鑑攷異引漢高祖實錄云是

夜偵知少帝伏甲欲與從臣謀害晉高祖

詐屏人對語方坐庭廡帝密遣御士石敢袖鎚立于後俄頃伏甲者

起敢有勇力擁晉高祖入一室以巨木塞門敢力當其

鋒死之帝解佩刀遇夜晦以在地葦炬未燃者奮擊之

眾謂短兵也遂散走帝乃匿身長垣下聞帝親將李洪

信謂人曰石太尉死矣帝隔垣呼洪信曰太尉無恙乃

踰垣出就洪信兵共護晉高祖

清河東三年夏移鎮汝陽帝勸晉高祖舉義贊成密計經



綸之始中外賴之晉高祖以帝爲北京馬步軍都指揮使及契丹以全軍赴難大破張敬達之衆于晉陽城下有降軍千餘人晉高祖將置之于親衛帝盡殺之晉國初建加檢校司空充侍衛馬步都指揮使權點檢隨駕六軍諸衛事尋改陝州節度使充侍衛親軍馬步都虞候契丹主送晉高祖至上黨指帝謂高祖曰此都軍甚操刺無大故不可棄之晉高祖入洛委帝巡警都邑肅然無敢犯令天福二年夏四月加檢校太保八月改許州節度使典軍如故三年夏四月加檢校太傅冬十月授侍衛親軍馬步軍都指揮使十一月移授宋州加檢

校太尉十二月加同平章事時帝與杜重威同制加恩

帝憤然不樂懇讓不受杜門不出者數日

通鑑知遠自以有佐命功

重威起于外戚無大功恥與之同制制下數日杜門四表辭不受

晉高祖怒召宰相趙

瑩等議落帝兵權任歸私第瑩等以爲不可乃遣端明殿學士和凝就第宣諭帝乃承命五年三月改鄴都留守兼侍衛親軍馬步軍都指揮使九月奉詔赴闕晉高祖幸其第六年七月授北京畱守河東節度使七年正月加侍中時天下大蝗惟不入河東界六月晉高祖崩于鄴宮少帝卽位加帝檢校太師八年三月進位中書令開運元年正月契丹南下契丹主以大軍直抵澶州



遣蕃將偉王率兵入雁門朝廷以帝爲幽州道行營招  
討使帝大破偉王于忻口尋奉詔起兵至土門軍至樂  
平會契丹退乃還三月封太原王七月兼北面行營都  
統二年四月封北平王三年五月加守太尉是月帝誅  
吐渾白承福等五族凡四百人以別部王義宗統其餘  
衆九月案此下有脫文犯塞帝親率牙兵至朔州南陽武谷大  
破之東都事略郭進傳契丹屠安陽高祖遣進拒戰契丹敗走以功除刺史十一月契丹  
主率蕃漢大軍由易定抵鎮州杜重威等駐軍于中渡  
橋以禦之十二月十日杜重威等以全軍降于契丹十  
七日相州節度使張彥澤受契丹命陷京城遷少帝于

開封府帝聞之大駭分兵守境以備寇患天福十二年  
春正月丁亥朔契丹主入東京癸巳晉少帝蒙塵于封  
禪寺癸卯少帝北遷二月丁巳朔契丹主具漢法服御  
崇元殿受朝制改晉國爲大遼國大赦天下號會同十  
年是月帝遣牙將王峻奉表于契丹契丹主賜詔褒美  
呼帝爲兒又賜木柺一蕃法貴重大臣方得此賜亦猶  
漢儀賜几杖之比也王峻持柺而歸契丹望之皆避路  
及峻至太原帝知契丹政亂乃議建號焉是月秦州節  
度使何建以其地入于蜀戊辰河東行軍司馬張彥威  
與文武將吏等以中原無主帝威望日隆羣情所屬上



賤勸進帝謙讓不允自是羣官三上賤諸軍將吏緇黃  
耆耄相次迫請教答允之庚午陝府屯駐奉國指揮使  
趙暉侯章都頭王晏殺契丹監軍及副使劉愿暉自稱  
留後契丹因授暉陝州兵馬留後侯章為本州馬步軍  
都指揮使王晏為副都指揮使暉等不受命宋史王晏傳開運未  
與本軍都校趙暉忠衛都校侯章等戍陝州會契丹至  
汴遣其將劉愿據陝恣行暴虐晏與暉等謀曰今契丹  
南侵天下洶洶英雄豪傑固當乘時自奮且聞太原劉  
公威德遠被人心歸服若殺愿送款河東為天下唱首  
則取富貴如反掌耳暉等然之晏乃率敢死士數人夜  
踰城入府署劫庫兵給其徒遲明斬愿首懸府門外眾  
請暉為帥章為本城副指揮使內外巡檢辛未帝于太  
使兼都虞候乃遣其子漢倫奉表晉陽

原宮受册即皇帝位制改晉開運四年為天福十二年

契丹國志云漢主仍稱天福年號曰予未忍忘晉也甲戌帝以晉帝舉族北遷憤

惋久之是日率親兵趨土門路邀迎晉帝至壽陽聞其  
已過乃還契丹聞帝建號偽制削奪帝官爵以通事耿  
崇美為潞州節度使高唐英為相州節度使崔廷勳為  
河陽節度使以扼要害之地丁丑磁州賊帥梁暉據相  
州已卯帝遣都將史宏肇率兵討代州平之初代州刺  
史王暉叛歸契丹宏肇一鼓而拔之斬暉以徇庚辰權  
晉州兵馬留後張晏洪奏軍亂殺知州副使駱從朗及  
括錢使諫議大夫趙熙以城歸順時晉州留後劉在明  
赴東京朝于契丹從朗知軍州事帝方遣使張晏洪辛



處明等告諭登極從朗囚之本城大將藥可儔殺從朗于理所州民相率害趙熙三軍請晏洪爲留後處明爲都監辛巳權陝州留後趙暉權潞州留後王守恩並上表歸順癸未澶州賊帥王瓊與其衆斷本州浮橋瓊敗死之時契丹以族人朗鄂爲澶州節度使朗鄂性貪虐吏民苦之瓊爲水運什長乃構夏津賊帥張乙得千餘人沿河而上中夜竊發自南城殺守將絕浮航入北城朗悟據牙城以拒之數日會契丹救至瓊敗死焉契丹主初聞其變也懼甚由是大河之南無久留之意尋遣天雄軍節度使杜重威歸鎮三月丙戌朔詔河東管內

自前稅外雜色徵配一切除放是日契丹主坐崇元殿行入閣之禮契丹主以舅蕭翰爲宣武軍節度使辛卯權延州留後高允權遣判官李彬奏本道節度使周密爲三軍所逐以允權知留後事上表歸順未幾帝召密赴行在壬辰丹州都指揮使高彥珣殺契丹所命刺史據城歸命壬寅契丹主發自東京還本國是日宿于赤崗至晡有大聲如雷起于敵帳之下契丹自黎陽濟河遂趨相州庚戌帝以北京馬步都指揮使泗州防禦使檢校太保劉崇爲太原尹檢校太尉以北京馬步軍都虞候郭從義爲鄭州防禦使檢校太保以北京興捷左



廂都指揮使李洪信爲陳州刺史檢校司徒以興捷右廂都指揮使尚洪遷爲單州刺史檢校司徒以北京武節左廂都指揮使蓋萬爲蔡州刺史以武節右廂都指揮使周暉爲濮州刺史以保寧都指揮使朱奉千爲隨州刺史辛亥吐渾節度使王義宗加檢校太尉以前忻州刺史秦習爲耀州團練使癸丑以北京副畱守檢校司徒白文珂爲河中節度使檢校太尉夏四月己未以北京馬軍都指揮使集州刺史劉信爲滑州節度使充侍衛馬軍都指揮使檢校太傅以北京隨使右都押衙楊邠爲權樞密使檢校太保以北京武節都指揮使雷

州刺史史宏肇爲許州節度使充侍衛步軍都指揮使檢校太傅以北京牢城都指揮使壁州刺史常思爲鄧州節度使檢校太傅兼權北京馬步軍都指揮使三城巡檢使以河東行軍司馬張彥威爲同州節度使檢校太保以蕃漢兵馬都孔目官郭威爲權樞密使檢校司徒以河東左都押衙扈彥珂爲宣徽南院使檢校司徒以右都押衙王浩爲宣徽北院使檢校司徒以兩使都孔目官王章爲權三司使檢校太保是日契丹主取相

州殺畱後梁暉

宋史李穀傳潛遣河朔酋豪梁暉入據安陽契丹主患之卽謀北旋會有告契

丹以城中虛弱者契

暉磁州滏陽人少爲盜會契丹入丹還攻安陽陷其城



汴暉收集徒黨先入磁州無所侵犯遣使送欵于帝暉  
偵知相州頗積兵仗且無守備遂以三月二十一日夜  
與其徒踰垣而入殺契丹數十人奪器甲數萬計遂據  
其城契丹主先遣相州節度使高唐英率兵討之未幾  
契丹主至城下是月四日攻拔之遂屠其城翼日契丹  
主北去命高唐英鎮之唐英閱城中遺民得男女七百  
人而已乾祐中王繼宏鎮相州奏于城中得髑髏十餘  
萬殺人之數從可知也庚申以石州刺史易全章為洛  
州團練使以前遼州刺史安真為宿州團練使以嵐州  
刺史孟行超為潁州團練使以汾州刺史武彥宏為曹

州防禦使以前憲州刺史慕容信為齊州防禦使以遼  
州刺史薛瓊為亳州防禦使以沁州刺史李漢韜為汝  
州防禦使癸亥冊魏國夫人李氏為皇后甲子以皇長  
子承訓為左衛上將軍第二子承祐為左衛大將軍第  
三子承勳為右衛大將軍皇女彭城郡君宋氏封永寧  
公主皇姪承贊為右衛上將軍以河東節度判官蘇逢  
吉為中書侍郎同平章事集賢殿大學士以河東觀察  
判官蘇禹珪為中書侍郎同平章事升府州為節鎮加  
永安軍額以振武節度使府州團練使折從阮為永安  
軍節度使行府州刺史檢校太尉以北京隨使左都押



衙劉銖爲河陽節度使以河東支使韓祚爲左諫議大夫充樞密直學士乙丑遣史宏肇率兵一萬人趨潞州丙寅以權知潞州軍州事左驍衛大將軍王守恩爲潞州節度使檢校太保以權點檢延州軍州事高允權爲延州節度使檢校太保以尙嵐軍使鄭謙爲忻州刺史遙領應州節度使充忻代二州義軍都部署丁卯以河東都巡館驛沿河巡檢使閻萬進爲嵐州刺史領朔州節度使充嵐憲二州義軍都制置戊辰權河陽畱後武行德以城來歸初契丹主將發東京船載武庫兵仗自汴浮河欲置之于北地遣奉國都虞候武行德部送與

軍士千餘人并家屬俱行至河陰軍亂奪兵仗殺契丹監吏衆推行德爲帥與河陰屯駐軍士合乃自汜水抵河陽河陽僞命節度使崔廷勳率兵拒之兵敗行德等

追躡之廷勳棄城而遁行德因據其城

隆平集武行德傳行德陷于契

丹僞請自効因遣送將校數十人護所取尚方鎧甲還契丹至河陰行德謂衆曰我與若等能爲邊地鬼耶衆素伏其威名皆曰惟命遂攻孟州走其節度使崔廷勳悉以府庫分諸校而權領州事遣其弟行太詣太原勸

進僞命西京畱守劉晞棄洛城南走許州遂奔東京洛

京巡檢使方太自署知畱守事未幾太爲武行德所害是日蕃將耿崇美屯澤州史宏肇遣先鋒將馬誨率兵擊之崇美退保懷州崔廷勳以契丹衆攻武行德于河



陽行德出戰為廷勳所敗汴州蕭翰遣蕃將高牟翰將  
兵援送劉晞復歸于洛牟翰至殺前澶州節度使潘環  
于洛陽辛未以河陽都部署武行德為河陽節度使檢  
校太尉充一行馬步軍都部署甲戌潞州節度使王守  
恩加檢校太尉以前棣州刺史慕容彥超為澶州節度  
使檢校太保丙子契丹主耶律德光卒于鎮之樂城趙  
延壽于鎮州自稱權知國事辛巳陝州節度使趙暉加  
檢校太尉華州節度使兼陝州馬步軍都指揮使侯章  
加檢校太傅以陝府馬步軍副都指揮使兼絳州防禦  
使王晏為晉州節度使檢校太傅以丹州都指揮使權

知軍州事高彥珣為丹州刺史

隆平集王晏傳云漢祖  
威名未振而晏等歸之

甚喜即授  
以節度使



舊五代史卷九十九

舊五代史卷九十九攷證

漢高祖紀上帝大破偉王于忻口

案漢祖破偉王是

書作開運元年正月歐陽史漢本紀作三年五月晉  
本紀又載開運元年正月辛丑劉知遠及契丹偉王  
戰于秀容敗之兩紀年月互異應以是書爲據

三年五月加守太尉是月帝誅吐渾白承福等五族

案歐陽史作八月殺吐渾白承福等族

壬寅契丹主發自東京還本國 案遼史太宗紀作四

月丙辰朔發自汴州與是書異歐陽史及通鑑俱從  
是書作壬寅



殺契丹數十人 案契丹國志作殺遼兵數百

丙子契丹主耶律德光卒于鎮之樂城 案遼史太宗

紀四月丁丑崩于樂城與是書異歐陽史及通鑑俱  
從是書作丙子

朗鄂舊作朗五今改

舊五代史卷九十九攷證

舊五代史卷一百

宋門下侍郎參知政事監修國史薛居正等撰

漢書第二

高祖紀下

天福十二年夏五月乙酉朔契丹所署大丞相政事令  
東京留守燕王趙延壽爲永康王烏裕所繫旣而烏裕  
召蕃漢臣寮于鎮州牙署矯其主遺詔命烏裕嗣位于  
是發哀成服辛卯詔取五月十三日車駕南幸甲午以  
判太原府事劉崇爲北京留守命皇子承訓武德使李  
暉大內巡檢丙申帝發河東取陰地關路幸東京時星



官言太歲在午不利南巡故路出陰地丁酉史宏肇奏

澤州刺史翟令奇以郡來降宋史李萬超傳史宏肇路

徑澤州刺史翟令奇堅壁拒命萬超馳至城下諭之曰今契丹北遁天下無主并

州劉公仗大義定中土所向風靡後服者族盡早圖之

令奇乃開門迎納宏肇即留萬超權州事是日契丹所署汴州節度使蕭翰

迎郇國公李從益至東京請從益知南朝軍國事己亥

蕭翰發離東京北去乙巳契丹永康王烏裕自鎮州還

蕃行次定州以定州節度副使耶律忠為定州節度使

孫方簡為雲州節度使方簡不受命遂歸狼山戊申車

駕至絳州本州刺史李從朗以郡降初契丹遣偏校成

霸卿曹可璠等守其郡帝建義之始不時歸命及車駕

至帝耀兵于城下不令攻擊從朗等遂降六月乙卯契

丹河中節度使趙贊起復河中節度使是日契丹右僕

射兼中書侍郎平章事張礪卒于鎮州丙辰車駕至洛

兩京文武百僚自新安相次奉迎郇國公李從益唐明

宗淑如王氏皆賜死于東京甲子車駕至東京丙寅以

漢州就糧歸捷指揮使張建雄為濮州刺史以金州守

禦指揮使康彥環為金州防禦使建雄彥環皆因亂害

本州刺史自知州事故有是命以北京知進奏王從璋

為內客省使戊辰制大赦天下應天福十二年六月十

五日昧爽已前天下見禁罪人已結正未結正已發覺



未發覺除十惡五逆外罪無輕重咸赦除之諸州去年  
殘稅並放東西京一百里內放今年夏稅一百里外及  
京城今年屋稅並放一半契丹所授職任不議改更諸  
貶降官未量移與量移已量移者與敘錄徒流人並放  
還應係欠省錢家業抵當外並放宜以國號爲大漢年  
號依舊稱天福云已已詔青州襄州安州復爲節鎮曹  
陳二州依舊爲郡壬申北京畱守劉崇加同平章事以  
中書舍人劉繼儒爲宗正卿翰林學士承旨尙書兵部  
侍郎張允落職守本官以尙書左丞張昭爲吏部侍郎  
以左散騎常侍邊歸譔爲禮部侍郎以左散騎常侍王

仁裕爲戶部侍郎充翰林學士承旨以右諫議大夫張  
沆爲左散騎常侍充翰林學士以戶部侍郎李式爲光  
祿卿以翰林學士尙書禮部侍郎邊光範爲衛尉卿甲  
戌詔文武臣僚每遇內殿起居輪次上封事丁丑以湖  
南節度使馬希範卒輟視朝三日是月契丹所命相州  
節度使高唐英爲屯駐指揮使王繼宏楚暉所殺秋七  
月己丑以御史中丞趙上交爲太僕卿以戶部侍郎邊  
蔚爲御史中丞甲午武安軍節度副使水陸諸軍副都  
指揮使判內外諸司江南西道觀察等使檢校太尉馬  
希廣加檢校太師兼中書令行潭州大都督天策上將



軍充武安軍節度湖南管內觀察使江南諸道都統封  
楚王丙申以鄴都畱守天雄軍節度使檢校太師守太  
傅兼中書令衛國公杜重威爲宋州節度使加守太尉  
以宋州節度使檢校太師兼中書令高行周爲鄴都畱  
守加守太傅以鄆州節度使檢校太師兼侍中李守貞  
爲河中節度使加兼中書令以河中節度使檢校太尉  
趙贊爲晉昌軍節度使宋史趙贊傳贊懼漢疑已潛遣  
親吏趙僊奉表歸蜀判官李恕  
者趙延壽賓佐深所委賴至家事亦參之及贊出鎮從  
爲上介至是恕語贊曰燕王入遼非所願也漢方建國  
必務懷柔公若泥首歸朝必保富貴狼狽入蜀理難萬  
全儻若不容後悔無及公能聽納請先入朝爲公申理  
贊卽遣恕詣闕漢祖見恕問贊何以附蜀恕曰贊家在  
燕薊身受契丹之命自懷憂恐謂陛下終不能容招引

西軍蓋圖苟免臣意國家甫定務安臣民所以令臣乞  
哀求覲漢祖曰贊之父子亦吾人也事契丹出于不幸  
今聞延壽落于陷穽吾忍不容贊耶恕未  
還贊已離鎮入朝卽命爲左驍衛將軍以晉昌軍節

度使張彥超爲鄆州節度使加檢校太師庚子以徐州  
節度使檢校太師同平章事岐國公符彥卿爲兗州節  
度使加兼侍中以鄆州節度使檢校太師王周爲徐州  
節度使加同平章事以許州節度使檢校太保劉重進  
爲鄆州節度使加檢校太傅以兗州節度使檢校太師  
兼侍中安審琦爲襄州節度使檢校太師莒國公李從  
敏爲西京畱守加同平章事以鳳翔節度使檢校太師  
同平章事侯益依前鳳翔節度使加兼侍中辛丑故守



司空兼門下侍郎平章事譙國公劉昫贈太保甲辰華  
州節度使侯章同州節度使張彥威涇州節度使史威  
並加檢校太尉以晉昌軍節度使檢校太保劉銖爲青  
州節度使加檢校太尉同平章事以河中節度使檢校  
太尉白文珂爲鄆州節度使加同平章事以青州節度  
使楊承信爲安州節度使加檢校太傅滑州節度使兼  
侍衛馬軍都指揮使劉信許州節度使兼侍衛步軍都  
指揮使史宏肇並加檢校太尉庚戌以司天監任延浩  
爲殿中監以司天少監杜昇爲司天監是月契丹永康  
王烏裕囚祖母舒嚕氏于木葉山閏月辛酉以左衛上

將軍皇甫立爲太子太師致仕乙丑禁造契丹樣鞍轡  
器械服裝故開封尹桑維翰贈尚書令故西京留守景  
延廣贈中書令以衛尉卿薛仁謙爲司農卿丙寅唐故  
樞密使郭崇韜贈中書令故河中節度使安重誨贈尚  
書令故華州節度使毛璋贈侍中故汴州節度使朱守  
殷贈中書令丁卯故青州節度使楊光遠贈尚書令追  
封齊王仍令所司追諡立碑唐故河中節度使西平王  
朱友謙追封魏王故樞密使馮贇贈中書令故河陽節  
度使判六軍康義誠贈中書令故西京留守京兆尹王  
思同故邠州節度使藥彥稠故襄州節度使安重進故



鎮州節度使安重榮並贈侍中庚午以前延州留後薛  
可言爲宣徽北院使以監察御史王度爲樞密直學士  
新授宋州節度使杜重威據鄴都叛詔削奪重威官爵  
貶爲庶人以高行周爲行營都部署率兵進討辛未以  
權樞密使楊邠爲樞密使加檢校太傅以權樞密副使  
郭威爲副樞密使加檢校太保以權三司使王章爲三  
司使加檢校太傅壬申故晉昌軍節度使趙在禮贈中  
書令故曹州節度使石贇贈侍中故滑州節度使皇甫  
遇贈中書令故同州節度使劉繼勳故貝州節度使梁  
漢璋皆贈太尉故宣徽使孟承誨贈太保丁丑有彗出

于張旬日而滅己卯陝州節度使趙暉加階爵晉州節  
度使王晏加檢校太尉河陽節度使武行德加階爵延  
州節度使高允權加檢校太尉鄧州節度使常思加檢  
校太尉移鎮潞州庚辰追尊六廟以太祖高皇帝世祖  
光武皇帝爲不祧之廟高曾已下四廟追尊諡號已載  
于前矣是日權太常卿張昭上六廟樂章舞名太祖高  
皇帝室酌獻請依舊奏武德之舞世祖光武皇帝室酌  
獻請依舊奏大武之舞文祖明元皇帝室酌獻請奏靈  
長之舞德祖恭僖皇帝室酌獻請奏積善之舞翼祖昭  
獻皇帝室酌獻請奏顯仁之舞顯祖章聖皇帝室酌獻



請奏章慶之舞其六廟歌詞文多不錄八月壬午朔鎮  
州駐屯護聖左廂都指揮使白再筠等逐契丹所命節  
度滿達勒復其城滿達勒與河陽節度崔廷勳洛京  
守劉晞並奔定州馳驛以聞庚寅以洛州團練使薛懷  
讓爲邢州節度使辛卯詔恒州復爲鎮州順國軍復爲  
成德軍乙未以護聖左廂都指揮使恩州團練使白再  
筠爲鎮州留後丙申詔天下凡關賊盜不計贓物多少  
案驗不虛並處死以兩浙節度使守太師兼中書令吳  
越國王錢宏佐薨廢朝三日丙午以吐渾府節度使檢  
校太尉王義宗爲沁州刺史依前吐渾節度使己酉以

刑部尙書竇貞固爲吏部尙書是日薛懷讓奏收復邢  
州殺僞命節度副使知州事劉鐸初懷讓爲洛州防禦  
使滿達勒亟發健步督洛州糧運懷讓殺之以聞帝遣  
郭從義與懷讓攻取邢州蕃將楊衮來援鐸懷讓拒之  
不勝退保洛州敵騎掠其部民大被其苦會鎮州逐滿  
達勒楊衮收兵退鐸乃上表請命懷讓乘其無備遣人  
給鐸云奉詔襲契丹請置頓于郡鐸開門迎之卽爲懷  
讓所害時人寃之鐸初受契丹命爲邢州都指揮使及  
永康王以高奉明爲節度滿達勒署鐸爲邢州副使兼  
都指揮使帝至東京奉明歸鎮州令鐸知邢州事至是



遇害庚戌文武百寮上表請以二月四日降誕日為聖壽節從之前晉昌軍節度副使李肅加左驍衛上將軍致仕是月遣使諸道和市戰馬九月甲子宰臣蘇逢吉兼戶部尚書蘇禹珪兼刑部尚書丁卯以吏部侍郎權判太常卿事張昭為太常卿戊辰故易州刺史郭璘贈太傅甲戌宰臣蘇逢吉加左僕射監修國史蘇禹珪加右僕射集賢殿大學士以吏部尚書竇貞固為守司空兼門下侍郎平章事宏文館大學士

宋史竇貞固傳初祖甚相得時蘇逢吉蘇禹珪自霸府僚佐驟居相位思得舊臣冠首以貞固持重寡言有時望乃拜司空門下侍郎平章事

以翰林學士行中書舍人李濤為中書侍郎兼

戶部尚書平章事

宋史李濤傳杜重威據鄴叛高祖命高行周慕容彥超討之二帥不協濤

密疏親征高祖覽奏以濤堪任宰輔是日權太常卿張即拜中書侍郎兼戶部侍郎平章事

昭上疏奏改一代樂名戊寅詔以杜重威叛命取今月

二十九日暫幸澶魏已卯以前樞密使李崧為太子太

傅以前左僕射和凝為太子太保庚辰車駕發京師冬

十月癸未以太子太保李鏘為司徒以太子太傅盧文

紀為太子太師以前磁州刺史李穀為左散騎常侍

宋史李穀傳舊制罷外郡歸本官至是進秩獎之也甲申車駕次韋城詔河北諸州

見禁罪人自十月五日昧爽以前常赦所不原者咸赦

除之壬辰日有黑子如雞卵丙申以相州留後王繼宏



爲相州節度使加檢校太傅至鄴都城下丙午詔都部  
署高行周督衆攻城帝登高阜以觀之時衆議未欲攻  
擊副部署慕容彥超堅請攻之是日王師傷夷者萬餘  
人不克而退十一月壬子雨木冰癸丑日南至從官稱  
賀于行宮己未湖南奏荆南節度使高從誨叛辛酉雨  
木冰壬申杜重威上表請命癸酉雨木冰丁丑杜重威  
素服出降待罪于宮門詔釋其罪鄴都畱守天雄軍節  
度使高行周加守太尉封臨清王以杜重威爲檢校太  
師守太傅兼中書令楚國公己卯以許州節度使兼侍  
衛步軍都指揮使史宏肇爲宋州節度使同平章事充

侍衛親軍馬步軍都指揮使以滑州節度使兼侍衛馬  
軍都指揮使劉信爲許州節度使同平章事充侍衛親  
軍馬步軍副都指揮使以澶州節度使慕容彥超爲鄆  
州節度使同平章事以前定州節度使李殷爲貝州節  
度使以鄭州防禦使郭從義爲澶州節度使十二月辛  
巳朔以護聖左廂都指揮使岳州防禦使李洪信爲遂  
州節度使充侍衛步軍都指揮使以護聖右廂都指揮  
使永州防禦使尙洪遷爲夔州節度使充侍衛步軍都  
指揮使丙戌車駕發鄴都歸京癸巳至自鄴都甲午以  
皇子開封尹承訓薨廢朝三日追封魏王丁酉帝舉哀



于太平宮庚子司徒李麟薨辛丑以前鄜州節度使郭  
謹爲滑州節度使加檢校太尉戊申宿州奏部民餓死  
者八百六十有七人乾祐元年正月辛亥朔帝不受朝  
賀乙卯制大赦天下改天福十三年爲乾祐元年自正  
月五日昧爽已前犯罪人除十惡五逆外罪無輕重咸  
赦除之已未改御名爲暲辛酉詔諸道行軍副使兩使  
判官並不得奏薦帶使相節度使許奏掌書記支使節  
度推官不帶使相節度使許奏掌書記節度推官其防  
禦團練判官軍事判官等聽奏所薦州縣官帶使相節  
度使許薦三人不帶使相二人防禦團練刺史一人云

以前鄆州節度使燕國公馮道爲守太師進封齊國公  
甲子帝不豫庚午以前宗正卿石光贊爲太子賓客以  
太僕卿趙上交爲秘書監丁丑故尚書左丞韓祚贈司  
徒二十七日丁丑帝崩于萬歲殿時年五十四祕不發

喪庚辰太傅杜重威伏誅

契丹國志云漢主名蘇逢吉

楊邠史宏肇入受顧命日承  
祐幼弱後事託在卿輩又曰善防杜重威是日殂逢吉  
等祕不發喪下詔稱重威父子因朕小疾謗議播衆皆  
斬之磔死于市  
市人爭啖其肉 二月辛巳朔內降遺制皇子周王承祐

可于柩前卽皇帝位是日發哀其年二月太常卿張昭

上諡曰睿文聖武昭肅孝皇帝廟號高祖十一月壬申

葬于睿陵宰臣蘇禹珪撰諡冊哀冊文云

五代史補高祖嘗在晉祖



麾下晉祖既起太原因高祖遂有天下先是豫章有僧號上藍者精于術數自唐末著讖云石榴花發石榴開議者以石榴則晉漢之謂也再言石榴者明享祚俱不過二世矣

史臣曰在昔皇天降禍諸夏無君漢高祖肇起并汾遶臨汴洛乘虛而取神器因亂而有帝圖雖曰人謀諒由天啓然帝昔莅戎藩素虧物望洎登宸極未厭人心徒矜拯溺之功莫契來蘇之望良以急于止殺不暇崇仁燕薊降師既連營而受戮鄴臺叛帥因閉壘以偷生蓋撫御以乖方俾征伐之不息及回鑾輅尋墮烏號故雖有應運之名而未覩爲君之德也

舊五代史卷一百

舊五代史卷一百攷證

漢高祖紀下矯其主遺詔命烏裕嗣位 案遼史世宗

紀作四月戊寅卽皇帝位歐陽史通鑑契丹國志俱從是書作五月與遼史異

乙巳契丹永康王烏裕自鎮州還蕃行次定州 案遼

史作甲申次定州與是書異

契丹河中節度使趙贊起復河中節度使 案遼史世

宗紀天祿二年十月壬午南京畱守魏王趙延壽薨

攷遼天祿二年卽漢乾祐二年此時天福十二年延壽尙未死也此必因延壽爲永康王所鎖而漢人傳



其已死遂起復其子贊以絕其北向之心耳

新授宋州節度使杜重威據鄴都叛詔削奪重威官爵  
貶爲庶人 案通鑑杜重威之叛在七月至閏月庚  
午乃削奪官爵五代春秋歐陽史作閏七月杜重威  
拒命與通鑑異

懷讓遣人給鐸云奉詔襲契丹請置頓于郡 案宋史  
薛懷讓傳懷讓遣人給鐸云我奉詔爲邢州帥據是  
書則懷讓實給鐸奉詔襲契丹以庚寅授邢州節度  
使非給之也特託言置頓于郡耳

丙申至鄴都城下 案通鑑作戊戌至鄴都城下與是

### 書異

甲午以皇子開封尹承訓薨廢朝三日追封魏王 案  
通鑑辛卯皇子開封尹承訓卒乙未追立爲魏王與  
是書紀日互異

烏裕舊作兀欲今改 舒嚕舊作述律今改 滿達勒  
舊作麻答今改



舊五代史卷一百攷證

舊五代史卷一百一

宋門下侍郎參知政事監修國史薛居正等撰

漢書第三

隱帝紀上

隱皇帝諱承祐高祖第二子也母曰李太后以唐長興二年歲在辛卯三月七日生帝于鄴都之舊第高祖鎮太原署節院使累官至檢校尚書右僕射國初授左衛大將軍檢校司空遷大內都點檢檢校太保乾祐元年正月二十七日高祖崩祕不發喪二月辛巳授特進檢校太尉同平章事封周王宣制畢有頃召文武百寮赴



萬歲殿內降大行皇帝遺制云周王承祐可于柩前卽  
皇帝位服紀日月一依舊制是日內外發哀成服初高  
祖欲改年號中書門下進擬乾和二字高祖改爲乾祐  
至是與御名相符甲申羣臣上表請聽政詔答不允凡  
四上表從之丁亥帝于萬歲殿門東廡下見羣臣尊母  
后爲皇太后己丑徐州節度使王周卒庚寅以前晉州  
畱後劉在明爲鎮州畱後幽州馬步軍都部署加檢校  
太尉是日工部尙書龍敏卒壬辰右衛大將軍王景崇  
奏于大散關大敗蜀軍俘斬三千人初契丹犯京師侯  
益趙贊皆受其命節制岐蒲聞高祖入洛頗懷反仄朝

廷移贊于京兆侯益與贊皆求援于蜀蜀遣何建率軍  
出大散關以應之至是景崇糾合岐雍邠涇之師以破  
之癸巳制大赦天下自乾祐元年二月十三日昧爽已  
前所犯罪人已結正未結正已發覺未發覺常赦所不  
原者咸赦除之中外文武臣寮竝與加恩馬步將士各  
賜優給唐晉兩朝求訪子孫立爲二王後云丙午鳳翔  
巡檢使王景崇遣人送所獲僞蜀將校軍士四百三十  
八人至闕下詔釋之仍各賜衣服以兵部侍郎張允爲  
吏部侍郎以工部侍郎司徒詡爲禮部侍郎丁未以光  
祿卿李式爲尙書右丞以禮部侍郎邊歸讜爲刑部侍



郎以刑部侍郎盧價爲兵部侍郎三月甲寅帝始御廣政殿羣臣起居殿中少監胡崧上言請禁砍伐桑棗爲薪城門所由專加捉搦從之丙辰鄴都畱守太尉中書令臨清王高行周進封鄴王北京畱守檢校太尉同平章事劉崇領宋州節度使兼侍衛親軍馬步軍都指揮使檢校太尉同平章事史宏肇竝加檢校太師兼侍中前邢州節度使安叔千以太子太師致仕戊午以右諫議大夫于德辰爲兵部侍郎庚申河中節度使檢校太師兼中書令李守貞加守太傅進封魯國公襄州節度使檢校太師兼中書令魏國公安審琦加守太保進封

齊國公兗州節度使檢校太師兼侍中岐國公符彥卿加兼中書令進封魏國公許州節度使兼侍衛親軍副都指揮使檢校太尉同平章事劉信加檢校太師壬戌以宰臣竇貞固爲山陵使吏部侍郎段希堯爲副使太常卿張昭爲禮儀使兵部侍郎盧價爲鹵簿使御史中丞邊蔚爲儀仗使丙寅以前鳳翔節度使兼西南面兵馬都部署檢校太師兼侍中侯益爲開封尹加兼中書令宋史侯益傳益率數十騎奔入朝隱帝遣侍臣問益連結蜀軍之由益對曰臣欲誘之出關掩殺之耳隱帝笑之益厚賂史宏肇輩言王景崇之橫恣諸權貴深庇護之乃授以開封尹兼中書令西京畱守檢校大師平章事莒國公李從敏夏州節度使檢校太



師同平章事李彝殷竝加兼侍中青州節度使檢校太尉同平章事劉銖鄆州節度使檢校太尉同平章事慕容彥超竝加檢校太師詔改廣晉府爲大名府晉昌軍爲承興軍戊辰靈州節度使檢校太師同平章事馮暉加兼侍中河陽節度使武行德滄州節度使王景華州節度使侯章晉州節度使王晏竝依前檢校太尉加同平章事庚午涇州節度使史懿潞州節度使常思同州節度使張彥威延州節度使高允權竝依前檢校太尉加同平章事澶州節度使郭從義邢州節度使薛懷讓竝自檢校太傅加檢校太尉以前奉國右廂都指揮使

王饒爲鄆州畱後甲戌以邠州節度使檢校太尉同平章事王守恩爲永興軍節度使加檢校太師以滑州節度使檢校太尉郭謹爲邠州節度使以前鎮州畱後檢校太傅白再筠爲滑州節度使加檢校太尉以陝州節度使檢校太尉同平章事趙暉爲鳳翔節度使以前河中節度使檢校太尉同平章事白文珂爲陝州節度使殿中監任延浩配流鄆州坐爲劉崇所奏故也丙子鄧州節度使劉重進相州節度使王繼宏安州節度使楊信竝自檢校太傅加檢校太尉以鎮州畱後兼幽州一行馬步軍都部署檢校太傅劉在明爲鎮州節度使加



檢校太師部署如故貝州節度使檢校太傅李殷加檢校太尉定州節度使檢校太尉孫方簡府州節度使檢校太傅折從阮竝加檢校太師丁丑中書侍郎兼戶部尚書平章事李濤罷免勒歸私第時蘇逢吉等在中書樞密使楊邠副樞密使郭威等權勢甚盛中書每有除授多爲邠等所抑濤不平之因上疏請出邠等以藩鎮授之樞密之務宜委逢吉禹珪疏入邠等知之乃見太后泣訴其事太后怒濤由是獲譴先是中書厨釜鳴者數四未幾濤罷免西道諸州奏河中李守貞謀叛發兵據潼關夏四月辛巳陝州兵馬監押王玉奏收復潼關

定州孫方簡奏三月二十七日契丹棄定州遁去壬午以樞密使楊邠爲中書侍郎兼吏部尚書平章事使如故以副樞密使郭威爲樞密使加檢校太尉三司使王章加檢校太尉同平章事郢州刺史尹實奏荆南起兵在境上欲攻城是日以澶州節度使郭從義爲永興軍一行兵馬都部署時供奉官時知化王益自鳳翔部署前永興節度使趙贊部下牙兵趙思綰等三百餘人赴闕三月二十四日行次永興思綰等作亂突入府城據城以叛故命從義帥師以討之甲申王景崇奏趙思綰叛見起兵攻討丁亥幸道宮佛寺禱雨戊子東南面兵



馬都元帥兩浙節度使檢校太師兼中書令吳越國王  
錢宏侖加諸道兵馬都元帥天策上將軍湖南節度使  
檢校太師兼中書令楚王馬希廣加守中書令以陝州  
節度使白文珂爲河中府城下一行都部署庚寅宰臣  
竇貞固蘇逢吉蘇禹珪並進封開國公辛卯削奪李守  
貞在身官爵甲午以翰林學士承旨戶部侍郎王仁裕  
爲戶部尚書以翰林學士左散騎常侍張沆爲工部尚  
書以翰林學士中書舍人范質爲戶部侍郎以樞密直  
學士尚書比部員外郎王度爲祠部郎中竝依前充職  
以待衛步軍都指揮使尚洪遷充西南面行營都虞候

以客省使王峻爲西南面行營兵馬都監戊戌以宣徽  
南院使扈彥珂爲左金吾上將軍庚子以左金吾大將  
軍充兩街使檢校太傅劉承贊爲徐州節度使甲辰以  
宣徽北院使薛可言爲右金吾上將軍以皇城使李暉  
爲宣徽南院使乙巳定州節度使孫方簡奏復入于本  
州初方簡爲狼山寨主叛晉歸契丹及契丹降中渡之  
師乃以方簡爲定州節度使契丹主死永康王嗣位卽  
以蕃將耶律忠代之移方簡爲雲州節度使方簡不受  
命遂歸狼山高祖至闕方簡歸欵復以中山命之是歲  
三月二十七日契丹棄定州隳城壁焚室廬盡驅人民



入蕃惟餘空城瓦礫而已至是方簡自狼山回保定州是月河決原武縣河北諸州旱徐州餓死民九百三十有七五月己酉朔國子監奏周禮儀禮公羊穀梁四經未有印板欲集學官考校彫造從之己未回鶻遣使朝貢丁卯前翰林學士徐台符自幽州逃歸乙亥河決滑州魚池六月戊寅朔日有食之庚辰以內客省使王峻爲宣徽北院使依前永興城下兵馬都監以冀州牢城指揮使張廷翰爲冀州刺史時廷翰殺本州刺史何行通自知州事故有是命甲申以皇弟右衛大將軍勳爲興元節度使檢校太尉同平章事豐州節度使郭勳加

檢校太師辛卯永興兵馬都部署郭從義奏得王景崇報有兵自隴州來欲投河中追襲至鄆城荆南節度使高從誨上表歸命從誨嘗拒朝命至是方遣牙將劉扶詣闕請罪丙申鎮州奏節度使劉在明卒戊戌以河陽節度使武行德爲鎮州節度使以宣徽南院使李暉爲河陽節度使以相州節度使王繼宏爲貝州節度使王寅荆南高從誨入貢謝恩釋罪丙午以前永興軍節度使王守恩爲西京畱守是月河北旱青州蝗秋七月戊申朔相州節度使王繼宏殺節度判官張易以訛言聞是時法尙深刻藩郡凡奏刑殺不究其實卽順其請故



當時從事鮮賓客之禮重足一跡而事之猶不能免其禍焉壬子以工部侍郎李穀充西南面行營都轉運使乙卯禮儀使張昭上高祖廟尊號獻舞名并歌辭舞曲請以觀德爲名歌辭不錄丙辰以久旱幸道宮佛寺禱兩是日大澍開封言陽武雍邱襄邑三縣蝗爲鸚鵡聚食詔禁捕鸚鵡庚申樞密使郭威加同平章事辛酉滄州上言自今年七月後幽州界投來人口凡五千一百四十七北土饑故也乙丑以宣徽北院使王峻爲宣徽南院使以內客省使吳虔裕爲宣徽北院使戊辰以遂州節度使兼侍衛親軍馬軍都指揮使李洪信爲澶州

節度使以澶州節度使郭從義爲永興軍節度使兼行營都部署庚午故兵部尙書李懌贈尙書左僕射鎮州奏準詔處斬節度副使張鵬訖鵬以一言之失爲鄴帥高行周所奏故命誅之乙亥新授鳳翔節度使趙暉奏與八作使王繼濤領部下兵同赴鳳翔時王景崇拒命故也八月己卯以華州節度使侯章爲邠州節度使以左金吾上將軍扈彥珂爲華州節度使壬午命樞密使郭威赴河中府軍前詔河府永興鳳翔行營諸軍一稟威節制時李守貞王景崇趙思綰連衡作叛朝廷雖命白文珂常思攻討河中物議以二帥非守貞之敵中外



憂之及是命之降人情大愜癸巳以奉國左廂都指揮使闕州防禦使劉訶爲夔州節度使充侍衛步軍都指揮使兼河中行營都虞候以護聖左廂都指揮使岳州防禦使李洪義爲遂州節度使充侍衛馬軍都指揮使乙未兩浙節度使檢校太尉兼侍中吳越國王錢宏俶加檢校太師兼中書令東南面兵馬都元帥宏俶故吳越王元瓘之子也先是其兄宏侖襲父位尋爲部下所廢以宏俶代之故特加是命焉新授鳳翔節度使趙暉奏部署兵士赴鳳翔城下癸卯郭威奏今月二十三日大軍已抵河府賊城至二十六日開長連塹畢築長連

城次九月戊申侯益部曲王守筠自鳳翔來奔言益家屬盡爲王景崇所害壬子郭威奏破河府賊軍于城下甲寅故夔州節度使兼侍衛步軍都指揮使尙洪遷贈太尉乙丑雪書不時也戊辰鳳翔都部署趙暉奏大破川軍于大散關殺三千餘人其餘棄甲而遁隆平集藥元福從趙暉進討兵衆寡數倍他將皆爲郤元福擁數百騎獨出令曰敢回頭者斬衆効死以戰遂有成功壬申

郭威奏得郭從義報今月十四日鳳翔王景崇兵士離本城尋遣監軍李彥從率兵襲至法門寺西殺戮二千餘人詔陞河中府解縣爲解州冬十月丙子朔山陵使竇貞固上大行皇帝陵名曰睿陵從之丁丑夕歲星入



太微戊寅趙暉奏破王景崇賊軍于鳳翔城下甲申吐蕃遣使獻方物丙戌右羽林將軍張播停任坐檢田受請託也丁亥中書舍人張誼責授房州司戶兵部郎中馬承翰責授慶州司戶竝員外置所在馳驛發遣先是誼與承翰俱銜命于兩浙覩其驕僭之失形于譏誚兼乘醉有輕肆之言錢宏俶恥之摭其過以奏之朝廷以方務懷柔故有是命甲辰延州奏夏州李彛殷先出兵臨州境欲應接李守貞今卻抽退十一月甲寅誅太子太傅李崧及其弟司封員外郎嶼國子博士義夷其族爲部曲誣告故也詔曰稔惡圖危難逃天網虧忠負義

必速神誅李崧頃在前朝最居重位略無裨益遂至滅亡及事契丹又爲親密士民俱憤險佞可知先皇帝含垢掩瑕推恩念舊擢居一品俾列三師不謂潛有包藏謀危社稷散差人使潛結姦兇附近山陵擬爲叛亂按其所告咸已伏辜宜正典章用懲姦逆其李崧李嶼李義一家骨肉及同謀作亂人竝從極法云庚申大行皇帝靈駕進發辛酉荆南奏節度使高從誨卒壬申葬高祖皇帝于睿陵十二月丁丑荆南節度副使檢校太傅行峽州刺史高保融起復授荆南節度使檢校太尉同平章事渤海郡侯壬午帝被衮冕御崇元殿授六廟寶



冊正使宰臣蘇禹珪使副大府卿劉暉赴西京行禮充  
州奏淮賊先于沂州界立柵前月十七日已歸海州爲  
李守貞牽制也南唐書嗣主六年李守貞遣從事朱元  
李平奉表來乞師以潤州李金全爲西  
面行營招撫使壽州劉彥貞爲副諫議大夫查文徽爲  
監軍使兵部侍郎魏岑爲沿淮巡撫使聞河中平遽班  
師又李金全傳云出師沐陽諸將銳  
于進取金全獨以爲遠不相及乃止 庚寅奉高祖神主  
于西京太廟淮南僞主李璟奉書于帝云先因河府李  
守貞求援又聞大國沿淮屯軍當國亦于境上防備昨  
聞大朝收軍當國尋已徹備其商旅請依舊日通行朝  
廷不報辛卯羣臣上表請以三月九日誕聖日爲嘉慶  
節從之延州節度使高允權奏得都頭李彥李遇等告

太子太師致仕劉景巖與鄉軍指揮使高志結集草寇  
欲取臘辰窺圖州城尋請使臣與指揮使李勳聊將兵  
士巡檢偵邏劉景巖果出兵鬪敵時卽殺敗其劉景巖  
尋獲斬之詔曰劉景巖年已衰暮身處退閒曾無止足  
之心輒肆包藏之毒結集徒黨窺伺藩垣所賴上將輸  
忠三軍協力盡除醜類克殄渠魁其劉景巖次男前德  
州刺史行琮已行極法長男渭州刺史行謙孫男邢州  
馬軍指揮使崇勳特放是冬多昏霧日晏方解



舊五代史卷一百一

舊五代史卷一百一攷證

漢隱帝紀上三月二十四日行次永興思綰等作亂突  
入府城據城以叛 案歐陽史云四月壬午永興軍  
將趙思綰叛附于李守貞據是書趙思綰據城叛在  
三月非四月事五代春秋通鑑俱從是書

八月壬午命樞密使郭威赴河中府軍前 案是書周  
太祖紀云七月西面師徒大集未果進取其月十三  
日制授帝同平章事卽遣西征據此紀則周太祖以  
七月庚申加同平章事八月壬午命赴河中府軍前  
非一時事也二紀前後自相矛盾歐陽史漢周本紀



亦各仍是書之舊未能參攷畫一通鑑定從是書漢紀

舊五代史卷一百一攷證

舊五代史卷一百一

宋門下侍郎參知政事監修國史薛居正等撰

漢書第四

隱帝紀中

乾祐二年春正月乙巳朔制曰朕以渺躬獲纘洪緒念守器承祧之重懷臨深履薄之憂屬以天道猶艱王室多故天降重戾國有大喪奸臣樂禍以圖危羣寇幸灾而何隙力役未息兵革方殷朕所以嘗膽履冰廢殮輟寐雖居億兆之上不以九五爲尊漸冀承平永安遐邇邇內則稟太后之慈訓外則仗多士之忠勲股肱叶謀爪



牙宣力西摧二叛撫其背而扼其喉北挫諸蕃斷其臂而折其脊次則巴邛嘯聚淮海猖狂纔聞矢接鋒交已見山摧岸沮寇難少息師徒無虧兼以修奉園陵崇建宗廟右賢左戚同寅協恭多事之中大禮無闕負荷斯重哀感良深今以三陽布和四序更始宜申兌澤允答天休卹獄緩刑赦過宥罪當萬物之孳甲開三面之網羅順彼發生以召和氣應乾祐二年正月一日昧爽已前天下見禁罪人除十惡五逆官典犯賊合造毒藥劫家殺人正身外其餘並放河府李守貞鳳翔王景崇永興趙思綰等比與國家素無讐釁偶因疑懼遂至叛逆

然以彼之生靈朕之赤子久陷孤壘可念非辜易子析骸填溝委壑爲人父母寧不軫傷但以屈已愛人先王厚德包垢含辱列聖美談宜推濟物之恩用廣好生之道其李守貞等宜令逐處都部署分明曉諭若能翻然歸順朕卽待之如初當保始終享其富貴明申信誓固無改移其或不順推誠堅欲拒命便可應時攻擊尅日盪平候收復城池罪止元惡其餘誑誤一切不問重念征討已來勞役滋甚兵猶在野民未息肩急賦繁徵財殫力匱矜卹之澤未被于疲羸愁嘆之聲幾盈于道路卽俟邊鋒少弭國患漸除當議優饒冀獲蘇息諸道藩



侯郡守等咸分寄任其體憂勞更宜念彼瘡痍倍加勤  
卹究鄉閭之疾苦去州縣之煩苛勸課耕桑省察冤濫  
共恢庶政用副憂勞凡百臣寮當體朕意壬子賜前昭  
義軍節度使張從恩衣一襲金帶鞍馬綵帛等時有投  
無名文字誣告從恩者故特有是賜以安其心乙卯河  
府軍前奏今日四日夜賊軍偷斫河西寨捕斬七百餘  
級時蜀軍自大散關來援王景崇郭威自將兵赴岐下  
將行戒白文珂劉詞等曰賊之驍勇並在城西慎爲儆  
備旣行至華州聞川軍退敗且憂文珂等爲賊奔突遂  
兼程而迴賊城內偵知郭威西行于正月四日夜遣賊

將王三鐵等

宋史王繼勳傳繼勳有武勇在軍陣常用鐵鞭鐵槊鐵槌軍中目爲王三鐵

率

驍勇千餘人沿流南行坎岸而登爲三道來攻賊軍已  
入王師砦中劉詞極力拒之短兵旣接遂敗之二月丙  
子詔諸道州府所征乾祐元年夏秋苗畝上紐征白米  
稗草已納外並放是日日黑霧四塞丁丑夕大風乙酉  
以前房州刺史李筠夫爲鴻臚卿戊子前右監門將軍  
喬達及其兄契丹僞命客省使榮等皆棄市達李守貞  
之妹壻也故皆誅之庚寅徐州巡檢使成德欽奏至峒  
晤鎮遇淮賊破之殺五百人生擒一百二十人戊戌大  
雨霖庚子詔左諫議大夫賈緯等修撰高祖實錄三月



丙辰以北京衙內指揮使劉鈞爲汾州防禦使夏四月  
丙子以荆南節度行軍司馬武泰軍節度留後王保義  
爲檢校太尉領武泰軍節度使行軍如故丁丑潁州獻  
紫兔白兔是月幽定滄貝深冀等州地震辛巳太白經  
天辛丑幸道宮禱雨五月甲辰朔故湖南節度使檢校  
太尉兼中書令扶風郡公贈太師馬希聲追封衡陽王  
戊申以前邠州節度使安審約爲左神武統軍以前洛  
京副留守袁義爲右神武統軍乙卯河府軍前奏今月  
九日河中節度副使周光遜棄賊河西寨與將士一千  
一百三十人來奔己未右監門大將軍許遷上言奉使

至博州博平縣界覩蝻生彌亘數里一夕並化爲蝶飛  
去辛酉兗鄆齊三州奏蝻生乙丑永興趙思綰遣牙將  
劉成詣闕乞降制授趙思綰華州節度留後檢校太保  
以永興城內都指揮使常彥卿爲虢州刺史丁卯宋州  
奏蝗抱草而死己巳湖南奏蠻寇賀州遣大將軍徐進  
率兵援之戰于風陽山下大敗蠻獠斬首五千級六月  
癸酉朔日有食之兗州奏捕蝗二萬斛魏博宿三州蝗  
抱草而死乙亥潁州獻白鹿戊寅安州節度使楊信奏  
亡父光遠蒙賜神道碑鐫勒畢無故中斷詔別令斷石  
鐫勒己卯滑濮澶漕兗淄青齊宿懷相衛博陳等州奏



蝗分命中使致祭于所在川澤山林之神開封府滑漕

等州蝗甚遣使捕之宋史段思恭傳隱帝蝗詔徧祈山

川思恭上言救過宥罪議獄緩刑苟獄訟平允則災害不生望令諸州

速決重刑無致淹濫必召和平從之壬午月犯心星辛

卯回鶻遣使貢方物丙申改商州乾元縣為乾祐縣隸

京兆府是月邠寧澤潞涇延鄜坊晉絳等州旱秋七月

辛亥湖南奏析長沙縣東界為龍喜縣從之丙辰樞密

使郭威奏收復河府羅城李守貞退保子城丁巳永興

都部署郭從義奏新除華州留後趙思綰自今月三日

授華州留後準詔赴任三移行期仍要鎧甲以給牙兵

及與之竟不遵路至九日夕有部曲曹進告思綰欲

于十一日夜與同惡五百人奔南山入蜀是日詰旦再

促上路云俟夜進途臣尋與王峻入城分兵守四門其

趙思綰部下軍各已執帶遂至牙署令趙思綰至則執

之與一行徒黨並處置訖甲子樞密使郭威奏收復河

中府逆賊李守貞自燔而死丙寅以權涼州留後折逋

嘉施為河西軍節度留後竟州奏捕蝻二萬斛丁卯前

洛州團練使武漢球卒戊辰永興軍節度使兼兵馬都

部署郭從義加同平章事徙華州節度使郭從義奏處

斬前巡檢使喬守温供奉官王益時知化任繼勳等守

温受高祖命巡檢京兆會王益自鳳翔押送趙思綰等



赴闕行至京兆守溫迎益于郊外思綰等突然作亂遂據其城及郭從義率兵攻討令守溫部署役夫守溫有愛姬陷在賊城爲思綰所錄及收城從義盡得思綰之婢僕守溫求其愛姬從義雖與之意有所慊遂發前罪密啓于郭威請除之與王益等併誅焉兗州奏捕蝗四萬斛壬午西京留臺侍御史趙礪彈奏太子太保王延太子洗馬張季凝等自去年五月後來每稱請假俱是不任拜起詔延等宜以本官致仕甲申以陝州節度使充河中一行兵馬都部署白文珂爲西京留守加兼侍中潞州節度使充河中一行副都署常思加檢校太師

以右散騎常侍盧撰爲戶部侍郎致仕辛卯右拾遺高守瓊上言仕官年未三十請不除授縣令詔起今後諸色選人年及七十者宜注優散官年少未歷資考者不得注擬縣令癸巳以翰林學士工部尙書張沆爲禮部尙書沆卜葬先人以內署無例乞假乃上章請解職以赴葬事遂落職以遣之乙未宣徽南院使永興行營兵馬都監王峻宣徽北院使河府行營兵馬都監吳虔裕並加檢校太傅九月乙巳樞密使郭威檢校太師兼侍中宋州節度使兼侍衛親軍都指揮使史宏肇加兼中書令初郭威平河中迴朝廷議加恩威奏曰臣出兵已



來輦轂之下無犬吠之憂俾臣得專一其事軍旅所聚  
貲糧不乏此皆居中大臣鎮撫謀畫之功也臣安敢獨  
擅其美乎帝然之于是宏肇與宰相樞密使三司使次  
第加恩旣而諸大臣以恩之所被皆朝廷親近之臣而  
宗室劉信及青州劉銖等皆國家元勳必有不平之意  
且外慮諸侯以朝廷有私于親近也于是議及四方侯  
伯普加恩焉丙午西京畱守判官時彥澄推官姜蟾少  
尹崔淑並免居官坐不隨府罷職爲畱臺侍御史趙礪  
所彈也已酉以右千牛上將軍孫漢贇爲絳州刺史禮  
部尙書判吏部尙書銓事王松停見任坐子仁寶爲李

守貞從事也尋卒于其第辛亥宰臣竇貞固加守司徒  
蘇逢吉加守司空蘇禹珪加左僕射楊邠加右僕射依  
前兼樞密使太子太師致仕皇甫立卒癸丑三司使王  
章加邑封乙卯鄴都高行周加守太師襄州安審琦加  
守太傅兗州府符彥卿加守太保北京劉崇加兼中書  
令丁巳澶州李洪信移鎮陝州以侍衛馬軍都指揮使  
遂州節度使李洪義爲澶州節度使己未許州劉信加  
兼侍中開封尹侯益進封魯國公鄆州慕容彥超青州  
劉銖並加兼侍中湖南馬希廣奏于八月十八日大破  
朗州馬希萼之衆辛酉靈州馮暉夏州李彝殷並加兼



中書令右衛將軍石懿左武衛將軍石訓並停任懿等  
以八月中秋享晉五廟命倡婦宿于齋宮鴻臚寺劾之  
故有是責癸亥鎮州武行德鳳翔趙暉並加檢校太師  
鄴都磁相邢洛等州奏霖雨害稼西京奏洛水溢岸乙  
丑晉州王晏同州張彥贇邠州侯章涇州史懿滄州王  
景延州高允權並加檢校太師冬十月庚午朔契丹入  
寇是日定州孫方簡徐州劉贇並加同平章事以利州  
節度使宋延渥爲滑州節度使甲戌皇弟興元節度使  
勳加檢校太師丙子相州郭謹貝州王繼宏邢州薛懷  
讓並加檢校太尉庚辰安州楊信鄧州劉重進加檢校

太師河陽李暉加檢校太傅壬午兩浙錢宏俶加守尚  
書令湖南馬希廣加守太尉癸未監修國史蘇逢吉史  
官賈緯以所撰高祖實錄二十卷上之丙戌荆南高保  
融加檢校太師兼侍中以殿前都部署江州防禦使李  
建爲遂州節度使充侍衛馬軍都指揮使以奉國左廂  
都指揮使永州防禦使王殷爲夔州節度使充侍衛步  
軍都指揮使契丹陷貝州高老鎮南至鄴都北境又西  
北至南宮堂陽殺掠吏民數州之地大被其苦藩郡守  
將閉關自固遣樞密使郭威率師巡邊仍令宣徽使王  
峻叅預軍事庚寅府州折從阮進封岐國公豐州郭勳



進封號國公十一月壬寅鄜州畱後王饒加檢校太傅  
癸丑以吳越國王錢宏俶母吳氏爲順德太夫人時議  
者曰封贈之制婦人有國邑之號死乃有諡后妃公主  
亦然唐則天女主自我作古乃生有則天之號韋庶人  
有順聖之號知禮者非之近代梁氏賜張宗奭妻號曰  
賢懿又改爲莊惠今以吳氏爲順德皆非古之道也乙  
卯以大府卿劉皞爲宗正卿十二月庚午朔湖南奏靜  
江軍節度使馬希瞻以今年十月十八日卒廢朝二日  
辛未日暈三重戊寅司徒門下侍郎平章事實貞固奏  
請修晉朝實錄詔史官賈緯竇儼王伸等修撰以禮部

尚書張沆復爲翰林學士壬午皇帝二十一姊永寧公  
主進封秦國長公主潁州奏破淮賊于正陽



舊五代史卷一百二

舊五代史卷一百二攷證

漢隱帝紀中安州節度使楊信

案楊信本名承信在

隱帝時避御名去承字是書仍當時實錄之舊

丁巳永興都部署郭從義奏新除華州留後趙思綰與

一行徒黨並處置訖 案歐陽史作郭威殺華州留

後趙思綰于京兆蓋威命從義圖之耳

甲子樞密使郭威奏收復河中府逆賊李守貞自燔而

死 案通鑑壬戌李守貞自焚死歐陽史作甲子克

河中祇以奏聞之日爲據也五代春秋繫于六月殊

誤



辛亥宰臣竇貞固加守司徒 案宋史竇貞固傳作隱  
帝卽位加司徒攷貞固加司徒在乾祐二年宋史作  
卽位所加蓋未詳攷

以利州節度使宋延渥爲滑州節度使 案延渥爲利  
州節度使于前未見王禹偁宋公神道碑云少帝嗣  
統授檢校太尉使持節利州諸軍事行利州刺史蓋  
延渥于元年出鎮利州二年復改鎮也是書未及詳  
載

舊五代史卷一百一攷證

舊五代史卷一百二

宋門下侍郎參知政事兼修國史薛居正等撰

漢書第五

隱帝紀下

乾祐三年春正月乙亥朔帝不受朝賀鳳翔行營都部  
署趙暉奏前月二十四日收復鳳翔逆賊王景崇舉族  
自燔而死丁未鳳翔節度使充西南行營都部署趙暉  
加兼侍中戊申密州刺史王萬敢奏奉詔領兵入海州  
界至荻水鎮俘掠焚蕩更請益兵詔前沂州刺史郭瓊  
率禁軍赴之庚午前永興軍節度副使安友規除名流



登州沙門島先是友規權知永興軍府事及趙思縉之  
奔衝友規失守城池至是乃正其罪焉癸亥以前邠州  
節度使宋彥筠爲太子太師致仕丙辰分命使臣赴永  
興鳳翔河中收葬用兵已來所在骸骨時已有僧聚髑  
髏二十萬矣前沂州刺史郭瓊奏部署兵士深入海州  
賊界是月有狐登明德樓主者獲之狐毛長而腹下別  
有二足二月辛巳青州奏郭瓊部署兵士自海州迴至  
當道甲申樞密使郭威巡邊迴丁亥汝州防禦使劉審  
交卒乙未以前安州節度使劉遂凝爲左武衛上將軍  
以鄜州節度使焦繼勳爲左衛上將軍以前永興軍節

度使趙贊爲左驍衛上將軍三月己亥徐州部送所獲  
淮南都將李暉等三十三人徇于市給衫帽放還本土  
是月鄴都畱守高行周兗州符彥卿鄆州慕容彥超西  
京畱守白文珂鎮州武行德安州楊信潞州常思府州  
折從阮皆自鎮來朝嘉慶節故也戊午宴羣臣于永福  
殿帝初舉樂壬戌鄴都高行周移鎮鄆州兗州符彥卿  
移鎮青州竝加邑封甲子西京畱守白文珂潞州常思  
鎮州武行德竝進邑封鄆州慕容彥超移鎮兗州夏四  
月戊辰朔邢州薛懷讓移鎮同州相州郭謹河陽李暉  
竝進邑封庚午府州折從阮移鎮鄧州辛未故青州刺



史史萬山贈太傅先是契丹入邊萬山城守郭威遣索萬進率騎七百屯深州一日契丹數千騎迫州東門萬山父子率兵百餘人襲之契丹偽退十餘里而伏兵發萬山血戰急請救于萬進萬進勒兵不出萬山死之

遼史

世宗紀天祿三年殺深州刺史史萬山

契丹亦解去時論以萬進爲罪故

加萬山贈典焉壬申華州劉詞移鎮邢州安州楊信移鎮鄆州貝州王令溫移鎮安州竝加邑封以鄆州留後王饒爲華州節度使以其來朝故也丁丑尚食奉御王紹隱除名流沙門島坐匿軍營女口也辛巳以宣徽北院使吳虔裕爲鄭州防禦使時樞密使楊邠上章乞解

樞機帝命中使諭之曰樞機之職捨卿用誰忽有此章莫有人離間否虔裕在傍颺言曰樞密重地難以久處俾後來者迭居相公辭讓是也中使還具奏帝不悅故有是命壬午以樞密使郭威鄴都畱守依前樞密使詔河北諸州應兵甲錢帛糧草一稟郭威處分癸未府州永安軍額宜停命降爲團練州戊子翰林學士承旨戶部尚書王仁裕罷職守兵部尚書左千牛上將軍張瓚卒庠寅以西南面水陸轉運使尚書工部侍郎李穀爲陳州刺史左金吾上將軍致仕馬萬卒甲午以前華州節度使安審信爲左衛上將軍以前潞州節度使張從



恩爲右衛上將軍五月戊戌朔帝御崇元殿受朝丙午  
以皇弟興元節度使勳爲開封尹加兼中書令未出閣  
甲子詔諸道州府差置散從官大府五百人上州三百  
人下州二百人勒本處團集管係立節級檢校教習以  
警備州城閏月癸巳京師大風雨壞營舍吹鄭門扉起  
十數步而墮拔大木數十震死者六七人水平地尺餘  
池隍皆溢是月宮中有怪物投瓦石擊窓撼扉人不能  
制六月庚子以國子祭酒田敏爲尙書右丞癸卯太僕  
卿致仕謝攀卒輟視朝一日鄭州奏河決原武縣界乙  
卯司天臺上言鎮星逆行至太微左掖門外自戊申年

八月十二日入太微西垣犯上將屏星執法勾已往來  
至己酉年十一月十二日夜方出左掖門順行自今年  
正月十日夜復逆行入東垣至左掖門秋七月庚午河  
陽奏河漲三丈五尺乙亥滄州奏積雨約一丈二尺安  
州奏滿河泛溢州城內水深七尺丙子帝御崇元殿授  
皇太后冊命宰臣蘇逢吉行禮辛巳三司使奏州縣令  
錄佐官請據戶籍多少量定俸戶縣三千戶已上令月  
十千主簿八千二千戶已上令月八千主簿五千二千  
戶已下令月六千主簿四千每戶月出錢五百竝以管  
內中等戶充錄事參軍判司俸錢視州界令佐取其多



者給之其俸戶與免縣司差役從之八月辛亥以蒙州城隍神爲靈感王從湖南請也時海賊攻州城州人禱于神城得不陷故有是請辛酉給事中陶穀上言請停五口內殿轉對從之壬戌以兵部侍郎于德辰爲御史中丞邊蔚爲兵部侍郎九月辛巳朗州節度使馬希萼奏請于京師別置邸院不允是時希萼與其弟湖南節度使希廣方構闕牆之怨故有是請帝以湖南已有邸務不可更置由是不允仍命降詔和解焉冬十月己亥帝狩于近郊丙午湖南馬希廣遣使上章且言荆南淮南廣南三道結構欲分割湖湘乞聊發兵師以爲援助

時朝廷方議起軍會內難不果行丁未兩浙錢宏俶加諸道兵馬元帥戊申彰德軍節度使郭謹卒癸丑以前同州節度使張彥贇爲相州節度使辛酉月犯心大星十一月甲子朔日有食之乙丑永州唐將軍祠贈太保從湖南請也已巳日南至帝御崇元殿受朝賀仗衛如式辛未詔侍衛步軍都指揮使王殷將兵屯澶州丙子誅樞密使楊邠侍衛都指揮使史宏肇三司使王章夷其族是日平旦甲士數十人由廣政殿出至東廡下害邠等于閤內死于亂刃之下又誅宏肇弟小底軍都虞候宏朗如京使甄彥奇內常侍辛從審楊邠子比部員



外郎廷侑右衛將軍廷偉右贊善大夫廷倚王章姪右  
領衛將軍旻子壻戶部員外郎張貽肅樞密院副承宣  
郭顥控鶴都虞候高進侍衛都承局荆南金三司都勾  
官柴訓等分兵收捕邠等家屬及部曲僉從盡戮之少  
頃樞密承旨聶文進急召宰臣百寮班于崇元殿庭宣  
曰楊邠史宏肇王章等同謀叛逆欲危宗社竝斬之與  
卿等同慶班退召諸軍將校至萬歲殿帝親諭史宏肇  
等欲謀逆亂之狀且言宏肇等欺朕年幼專權擅命使  
汝輩常懷憂恐自此朕自與汝等爲主必無橫憂也諸  
軍將校拜謝而退召前任節度使刺史統軍等上殿諭

之帝遣軍士守捉宮城諸門比近日盱朝臣步出宮門  
而去是日晴霽無雲而昏霧濛濛有如微雨人情惴恐  
日將午載楊邠等十餘尸分暴于南北市是日帝遣腹  
心賁密詔往澶州鄴都令澶州節度使李洪義誅侍衛  
步軍都指揮使王殷令鄴都屯駐護聖左廂都指揮使  
郭崇奉國左廂都指揮使曹英害樞密使郭威及宣徽  
使王峻急召鄆州高行周青州符彥卿永興郭從義兗  
州慕容彥超同州薛懷讓鄭州吳虔裕陳州李穀等赴  
闕以宰臣蘇逢吉權知樞密院事前青州劉銖權知開  
封府事侍衛馬軍都指揮使李洪建判侍衛司事內客



省使閻晉卿權侍衛馬軍都指揮使丁丑澶州節度使李洪義受得密詔知事不克乃引使人見王殷殷與洪義遣本州副使陳允穗賚所受密詔馳至鄴都宋史少帝遣供奉官孟業齎密詔令洪義殺王殷洪義素怯懦慮殷覺遷延不敢發遽引業見殷殷乃錮業送密詔于周祖郭威得之即召王峻郭崇曹英及諸軍將校至牙署視詔兼告楊史諸公冤枉之狀且曰汝等當奉行詔旨斷予首以報天子自取功名郭崇等與諸將校前曰此事必非聖意即李業等竊發假如如此輩便握權柄固得安乎事可陳論何須自棄致千載之下被此惡名崇等願從公入朝面自洗雪于是將校等請威入朝以除君

側之惡共安天下

東都事略漢隱帝遣使害太祖魏仁浦曰公有大功于朝廷握強兵臨重

鎮以讒見疑豈可坐而待斃教以易其語云誅將士以激怒衆心太祖納其言翌日郭威以衆

南行戊寅鄴兵至澶州庚辰至滑州節度使宋延渥開門迎降是日詔前開封尹侯益前鄜州節度使張彥超權侍衛馬軍都指揮使閻晉卿鄭州防禦使吳虔裕等率禁軍赴澶州守捉辛巳帝之小豎鷲脫自北迴先是帝遣鷲脫偵鄴軍所至為游騎所獲郭威即遣迴因令附奏赴闕之意仍以密奏置鷲脫衣領中帝覽奏即召李業示之聶文進郭允明在傍懼形于色初議車駕幸澶州及聞鄴兵已至河上乃止帝大懼私謂宰臣竇貞



固等曰昨來之事太草草耳李業等請帝領府庫以給諸軍宰相蘇禹珪以爲未可業拜禹珪于帝前曰相公且爲官家莫惜府庫遂下令侍衛軍人給二十緡下軍各給十緡其北來將士亦準此仍遣北來將士在營子弟各賫家問向北諭之壬午鄴軍至封邱慕容彥超自鎮馳至帝遂以軍旅之事委之

宋史侯益傳云周太祖起兵隱帝議出師禦之

益獻計曰王者無敵于天下兵不宜輕出况大名成卒家屬盡在京城不如閉關以挫其銳遣其母妻發降以招之可不戰而定慕容彥超以爲益衰老作懦夫計沮之彥超謂帝曰陛下勿憂臣當生致其魁首彥超退見聶文進詢北來兵數及將校名氏文進告之彥超懼曰大是劇賊不宜輕耳又遣袁

義劉重進王知則等出師以繼前軍慕容彥超以大軍

駐于七里郊掘塹以自衛都下率坊市出酒食以餉軍

癸未車駕勞軍卽日還宮翌日慕容彥超揚言曰官家

宮中無事明日再出觀臣破賊甲申車駕復出幸七里

店軍營王師陣于劉子陂與鄴軍相望太后以帝至晚

在外遣中使謂聶文進曰賊軍在近大須用意文進曰

有臣在必不失策縱有一百箇郭威亦當生擒之耳彥

超輕脫先擊北軍郭威命何福進王彥超李筠等大合

騎以乘之彥超退卻死者百餘人于是諸軍奪氣稍稍

奔于北軍吳虔裕張彥超等相繼而去慕容彥超以部



下十數騎奔兗州是夜帝與宰臣從官宿于野次侯益  
焦繼勳潛奔鄴軍乙酉旦帝策馬至元化門劉銖在門  
上問帝左右兵馬何在乃射左右帝迴與蘇逢吉郭允  
明詣西北村舍郭允明知事不濟乃割刃于帝而崩時  
年二十蘇逢吉郭允明皆自殺是日周太祖自迎春門  
入諸軍大掠煙火四發翌日至晡方定前滑州節度使  
白再筠爲亂兵所害吏部侍郎張允墜屋而死周太祖  
旣入京城命有司遷帝梓宮于太平宮或曰可依魏高  
貴鄉公故事以公禮葬之周祖曰予顛沛之中不能護  
衛至尊以至于此若又貶降人謂我何于是詔擇日舉

哀命前宗正卿劉皞主喪丙戌太后誥曰高祖皇帝翦  
亂除兇變家爲國救生靈于塗炭創王業于艱難甫定  
寰區遽遺弓劍樞密使郭威楊邠侍衛使史宏肇三司  
使王章親承顧命輔立少君協力同心安邦定國旋屬  
四方多事三叛連衡吳蜀內侵契丹啓釁丞黎兇懼宗  
社阡危郭威授任專征提戈進討躬當矢石盡掃煙塵  
外寇盪平中原寧謐復以強敵未殄邊塞多艱允賴寶  
臣往臨大鄴疆場有藩籬之固朝廷寬宵旰之憂不謂  
兇豎連謀羣小得志密藏鋒刃竊發殿庭已殺害其忠  
良方奏聞于少主無辜受戮有口稱冤而又潛差使臣



矯賁宣命謀害樞密使郭威宣徽使王峻侍衛步軍都  
指揮使王殷等人知無罪天不助奸今者郭威王峻澶  
州節度使李洪義前曹州防禦使何福進前復州防禦  
使王彥超前博州刺史李筠北面行營馬步都指揮使  
郭崇步軍都指揮使曹英護聖都指揮使白重贊索萬  
進田景咸樊愛能李萬全史彥超奉國都指揮使張鐸  
王暉胡立弩手指揮使何贊等徑領兵師來安社稷逆  
黨皇城使李業內客省使閩晉卿樞密都承旨聶文進  
飛龍使後贊翰林茶酒使郭允明等脅君于大內出戰  
于近郊及至力窮遂行弑逆冤憤之極今古未聞今則

兇黨既除羣情共悅神器不可以無主萬幾不可以久  
曠宜擇賢君以安天下河東節度使崇許州節度使信  
皆高祖之弟徐州節度使贊開封尹承勳高祖之男俱  
列盤維皆居屏翰宜令文武百辟議擇嗣君以承大統  
云樞密使郭威以蕭牆變起宗祏無奉率羣臣候太后  
請定所立且言開封尹承勳高祖皇帝之愛子也請立  
爲嗣太后告以承勳羸病日久不能自舉周太祖與諸  
將請視承勳起居及視之方信遂議立高祖從子徐州  
節度使贊爲嗣己丑太后誥曰天未悔禍喪亂宏多嗣  
王幼冲羣兇蔽惑構奸謀于造次縱毒蠱于斯須將相



大臣連頸受戮股肱良佐無罪見屠行路咨嗟羣心扼腕則高祖之洪烈將墜于地賴大臣郭威等激揚忠義拯濟顛危除惡蔓以無遺俾綴旒之不絕宗祧事重繼才難旣聞將相之謀復攷著龜之兆天人協贊社稷是依徐州節度使贊稟上聖之資抱中和之德先皇如子鍾愛特深固可以子育兆民君臨萬國宜令所司擇日備法駕奉迎卽皇帝位於戲神器至重天步方艱致理保邦不可以不敬貽謀聽政不可以不勤允執厥中祇膺景命是日遣前太師馮道等往徐奉迎周太祖以嗣君未至萬幾不可暫曠率羣臣請太后臨朝誥答曰

昨以奸邪構釁亂我邦家勳德効忠翦除兇慝俯從人欲已立嗣君宗社危而再安紀綱壞而復振皇帝法駕未至庶事方殷百辟上言請予莅政宜允輿議權總萬幾止于浹旬卽復明辟云按前代故事太上皇稱誥太皇太后皇太后曰令今云誥有司誤也以宣徽南院使王峻爲樞密使右神武統軍袁義爲宣徽南院使陳州刺史李穀權判三司步軍都指揮使王殷爲侍衛親軍馬步都指揮使護聖左廂都指揮使郭崇爲侍衛馬軍都指揮使奉國左廂都指揮使曹英爲侍衛步軍都指揮使鎮州邢州馳奏契丹寇洛州陷內邱縣時契丹永



康王烏裕率部族兩道入邊內邱城小而固契丹攻之

五日不下敵人傷者甚衆時有官軍五百在城防戍攻

急官軍降于敵屠其城而去遼史世宗紀十月白將南

城大獲而還庚寅樞密使郭威奏左軍巡勘得飛龍使後贊

款伏與蘇逢吉李業閻晉卿聶文進郭允明等同謀令

散員都虞侯奔德等下手殺害史宏肇等權開封尹劉

銖具伏朋附李業爲亂屠害將相家屬其劉銖等準誥

旨處置訖并蘇逢吉郭允明閻晉卿聶文進首級竝梟

于南北市其骨肉放棄辛卯河北諸州馳報契丹深入

太后誥曰王室多故邊境未寧內難雖平外寇仍熾據

北面奏報強敵奔衝繼發兵師未聞平殄須勞上將暫

自臨戎宜令樞密使郭威部署大軍早謀掩擊其軍國

庶事權委宰臣竇貞固蘇禹珪樞密使王峻等商量施

行在京馬步兵士委王殷都大提舉十二月甲午朔郭

威領大軍北征丁酉以翰林學士尙書戶部侍郎知制

誥范質爲樞密副使東都事略周太祖征李守貞每朝

太祖問誰爲此辭使者以范質對太祖曰宰相器也

太祖起兵入京師遽令草太后誥及議迎湘陰公儀注乃

白太后以質爲兵部侍郎樞密副使陝州李洪信奏馬步都指揮使聶召

奉國指揮使楊德護聖指揮使康審澄等與節度判官

路濤掌書記張洞都押衙楊紹勅等同情謀叛竝殺之



惟康審澄夜中放火斬關奔歸京師初朝議以諸道方  
鎮皆是勳臣不諳政理其都押衙孔目官令三司軍將  
內選才補之藩帥不悅故洪信因朝廷多故誣奏加害  
焉壬寅湖南上言朗州馬希萼引五谿蠻及淮南洪州  
軍來攻當道望量差兵士于淮境牽引乙巳遣前淄州  
刺史陳恩讓領軍入淮南界以便宜進取辛亥遣宰相  
蘇禹珪及朝臣十員往宋州迎奉嗣君壬子樞密使郭  
威次澶州何福進已下及諸軍將士扶擁威請爲天子  
卽日南還威上章于太后言爲諸軍所迫班師庚申威  
至北郊駐軍于阜門村許州巡檢前申州刺史馬鐸奏

節度使劉信自殺壬戌奉太后誥命樞密使侍中郭威  
監國中外庶事竝取監國處分先是樞密使王峻以湘  
陰公已在宋州慮聞澶州之事左右變生遣侍衛馬軍  
指揮使郭崇率七百騎往衛之

東都事略郭崇傳王峻遣崇率七百騎拒贊遇

于睢陽崇曰澶州兵變遣崇來衛乘輿非有他也具言軍情有屬天命已定贊執崇手而泣崇卽送贊就館

已未太后誥曰比者樞密使郭威志安社稷議立長君  
以徐州節度使贊高祖近親立爲漢嗣爰自藩鎮徵赴  
京師雖誥命尋行而軍情不附天道在北人心靡東適  
當改卜之初俾膺分土之命贊可降授開府儀同三司  
檢校太師上柱國封湘陰公食邑三千戶食實封五百



戶明年正月丁卯太后誥奉符寶于監國可卽皇帝位  
周太祖踐阼奉太后爲母遷于西宮上尊號曰昭聖太  
后是月十五日周太祖與百寮詣帝殯宮成服親奠不  
視朝七日又詔太常定諡曰隱以其年八月二日復遣  
前宗正卿劉皞護靈輜備儀仗葬于許州陽翟縣之潁  
陵祔神主于高祖之寢宮帝姿貌白皙眉目疎朗未卽  
位時目多閃掣唾洩不止卽位之始遽無此態及內難  
將作復如故帝自關西平定之後稍自驕易然畏憚大  
臣未至縱恣嘗因乾象差忒宮中或有怪異召司天監  
趙延乂訊其休咎延乂對以修德卽無患旣退遣中使

就問延乂曰何者爲德延乂勸讀貞觀政要邇後與聶  
文進郭允明後贊狎習信其邪說以至于敗高祖之征  
鄴城也一日帝語太祖曰我夜來夢爾爲驢負我升天  
旣捨爾俄變爲龍捨我南去是何祥也周太祖撫掌而  
笑冥符胼蟹豈偶然哉

史臣曰隱帝以尙幼之年嗣新造之業受命之主德非  
禹湯輔政之臣復非伊呂將欲保延洪之運守不拔之  
基固不可得也然西摧三叛雖僅滅于櫓槍而內稔羣  
兇俄自取于狼狽自古覆宗絕祀之速者未有如帝之  
甚也噫蓋人謀之弗臧非天命之遽奪也



舊五代史卷一百三

舊五代史卷一百三攷證

漢隱帝紀下鳳翔行營都部署趙暉奏前月二十四日  
收復鳳翔 案歐陽史作正月趙暉克鳳翔據是書  
則收復鳳翔在二年十二月非三年春事也歐陽史  
蓋誤以告捷之月爲收復之月耳五代春秋作十二  
月收復鳳翔誅王景崇爲得其實

澶州刺史李洪義 案宋史洪義本名洪威避周太祖  
諱改

護聖左廂都指揮使郭崇 案東都事略郭崇初名崇  
威避周太祖諱止稱崇



庚辰至滑州節度使宋延渥開門迎降 案歐陽史作  
庚辰義成軍節度使宋延渥叛附于郭威與是書同  
通鑑作辛巳與是書異

郭允明知事不濟乃剗刃于帝而崩 案通鑑攷異引  
劉恕曰允明帝所親信何由弑逆蓋郭威兵殺事成  
之日諱之因允明自殺而歸罪耳

巳丑太后誥曰 案原本作乙丑與五代春秋同今從  
通鑑改作巳丑

烏裕舊作兀欲今改

舊五代史卷一百三攷證



